

VENDIM
Nr. 148, datë 28.6.2018

MBI KËRKESËN E OSHEE SHA PËR KONTESTIMIN E VENDIMIT NR. 110, DATË 14.5.2018, TË BORDIT TË ERE-s, LIDHUR ME KORRIGJIMIN E FATURAVE PËR SHËRBIMIN E BALANCIMIT, SIPAS PARASHIKIMEVE TË AKTEVE LIGJORE DHE NËNLIGJORE NË FUQI DHE PËRLLOGARITJEVE NGA OST SHA, TË RAKORDUARA DHE TË PRANUARA NGA PALËT PËRGJEGJËSE PËR PERIUDHËN 1 KORRIK 2016–31 DHJETOR 2017”

Në mbështetje të nenit 16, të ligjit nr. 43/2015, “Për sektorin e energjisë elektrike”, i ndryshuar, nenit 16 të “Rregullave të organizimit, funksionimit dhe procedurave të ERE-s”, miratuar me vendimin e bordit të ERE-s nr. 96, datë 17.6.2016, bordi i ERE-s, në mbledhjen e tij të datës 28.6.2018 mbasi shqyrtoi relacionin e drejtorive teknike, mbi kërkesën e OSHEE sh.a., për rishikimin e vendimit të bordit të ERE-s nr. 110, datë 14.5.2018, “Mbi zgjidhjen e mosmarrëveshjes ndërmjet KESH sh.a. dhe OST sh.a., lidhur me korrigjimet e faturave për shërbimin e balancimit sipas parashikimeve të akteve ligjore dhe nënligjore në fuqi dhe përlllogaritjeve nga OST sh.a. të rakorduara dhe të pranuar nga palët përgjegjëse për periudhën 1 korrik 2016–31 dhjetor 2017”,

konstatoi se:

Shoqëria OSHEE sh.a., me shkresën e saj nr. 9804, prot., datë 28.5.2018, protokolluar në ERE me nr. 404/1 prot., datë 30.5.2018, ka përcjellë në ERE kontestimin e vendimit të bordit të ERE-s nr. 110, datë 14.5.2018.

Në këtë korrespondencë, OSHEE sh.a. bën me dije se:

Është njohur me vendimin e Bordit të Komisionerëve të ERE-s nr. 110, datë 14.5.2018 “Mbi zgjidhjen e mosmarrëveshjes ndërmjet KESH sh.a. dhe OST sh.a., lidhur me korrigjimin e faturave për shërbimin e balancimit sipas parashikimeve të akteve ligjore dhe nënligjore në fuqi dhe përlllogaritjeve nga OST sh.a., të rakorduara dhe të pranuar nga palët përgjegjëse për periudhën 1 korrik 2016–31 dhjetor 2017”.

Shoqëria OSHEE sh.a. shpreh mosdakor-dësinë e saj në zbatimin e këtij vendimi pasi zbatimi i tij do të shkaktonte efekte të larta financiare për shoqërinë.

OSHEE sh.a. shprehet se “ashtu siç përmendet edhe në vendimin e sipërcituar faturat e disbalancave për periudhën 1 korrik 2016–31 dhjetor 2017 janë përlllogaritur në mënyrë korrekte nga shoqëria OST sh.a., bazuar në mekanizmin e llogaritjes së disbalancave sipas “Rregullave të përkohshme të tregut”, miratuar me vendimin nr. 139/2016 të ERE-s.

OSHEE sh.a., në vijim të shkresës nr. 9804, prot., datë 28.5.2018, protokolluar në ERE me nr. 404/1 prot., datë 30.5.2018, ka paraqitur në ERE gjithashtu, shkresën me nr. 9804/1 prot., datë 29.5.2018, e protokolluar me tonën nr. 404/3, datë 13.6.2018.

Në këtë korrespondencë, OSHEE sh.a. ka depozituar “Shtesë ankimi administrativ mbi vendimin nr. 110, datë 14.5.2018, “Mbi zgjidhjen e mosmarrëveshjes ndërmjet KESH sh.a. dhe OST sh.a., lidhur me korrigjimin e faturave për shërbimin e balancimit sipas parashikimeve të akteve ligjore dhe nënligjore në fuqi dhe përlllogaritjeve nga OST sh.a., të rakorduara dhe të pranuar nga palët përgjegjëse për periudhën 1 korrik 2016–31 dhjetor 2017”.

Në këtë komunikim, OSHEE sh.a., bën me dije se:

- në datën 23.5.2018, ka marrë dijeni mbi vendimin e ERE-s nr. 110, datë 14.5.2018.
- OSHEE sh.a., gjithashtu, bën me dije se këtë ankim e ka paraqitur në kuadër të parashikimeve të nenit 16 të Rregullave të procedurave të ERE-s, miratuar me vendimin e bordit të ERE-s nr. 96, datë 17.6.2016.
- OSHEE sh.a., nga data 1 janar 2018 e në vijim ka pranuar dhe zbatuar Rregullat e përkohshme për mekanizmin balancues të energjisë, miratuar me vendimin nr. 193, datë 24.11.2017 të ERE-s.
- OSHEE sh.a. në vijim edhe të shkresës nr. 9804/1 prot., datë 30.5.2018, depozituar në ERE në

datën 13.6.2018, nuk është dakord me këtë vendim të ERE-s, duke parashtruar në mënyrë të përmblëdhur se:

- Vendimi referon një periudhë kohore 1 korrik 2016–31 dhjetor 2017, periudhë për të cilën ka pasur rregullim mes palëve. (Ky rregullim provohet nga faturat tatimore të pranuar dhe konfirmuara...)

- Ky - vendim sjell një impakt financiar për OSHEE sh.a.

- Pasqyrat financiare të OSHEE sh.a., për vitet 2016 dhe 2017 janë mbyllur dhe janë depozituar në institucionet përkatëse.

- Faturat e rakorduara dhe të pranuar nga palët OST sh.a. dhe OSHEE sh.a. janë reflektuar në mbylljen e bilancit financiar të shoqërisë OSHEE sh.a. për pjesën e dytë të vitit 2016 dhe 2017.

- Ky vendim i jep fuqi prapavepruese aktit dhe referuar teorisë së të drejtës administrative dhe në veçanti KPA, neni 105, fuqi prapavepruese e aktit është një përjashtim nga rregulli i përgjithshëm dhe aktet administrative mund të kenë fuqi prapavepruese, konkretisht:

- c) Organi kompetent mund t'i japë fuqi prapavepruese aktit kur lejohet nga ligji dhe është në favor të palëve të interesuara dhe nuk dëmton të drejtat e një pale të tretë.

Lidhur me ankimin e OSHEE sh.a. sipas shkresave 9804, datë 28.5.2018 dhe 9804/1, datë 30.5.2018 (depozituar në ERE, në datën 13.6.2018), konstatohet se:

- Shoqëria OSHEE sh.a. ka marrë dijeni për vendimin nr. 110, datë 14.5.2018, të bordit të ERE-s, nëpërmjet shkresës nr. 404 prot., datë 22.5.2018 (depozituar në OSHEE sh.a., në datën 23.5.2018, konfirmuar nga OSHEE sh.a. në shkresën nr. 9804/1, datë 30.5.2018);

- Shoqëria OSHEE sh.a., me shkresën e saj nr. 9804, datë 28.5.2018, ka përcjellë në ERE kontestimin e vendimit nr. 110, datë 14.5.2018;

- Pika 5, e nenit 16, të ligjit nr. 43/2015, “Për sektorin e energjisë elektrike”, të ndryshuar, si dhe nenit 16 të “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.6.2016”, parashikon se: “Çdo palë e përfshirë në një procedurë mund t'i kërkojë ERE-s, brenda 7 ditëve kalendarike nga data e marrjes së vendimit lidhur me atë procedurë, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabimet materiale të konstatuara.”.

- Në lidhje me afatet e depozitimit të kërkesës nr. 9804, datë 28.5.2018, konstatohet se është respektuar afati prej 7 ditësh kalendarike duke qenë se subjekti ka marrë dijeni në datën 24.5.2018 dhe ka paraqitur ankesën në datën 30.5.2018.

OSHEE sh.a., në ankimin e saj, pretendon se parashtron si provë të re, efektet e larta financiare, ndaj OSHEE sh.a. Këtë pohim OSHEE sh.a. e ka parashtruar në datën 24.4.2018, ku u zhvillua takimi me prezencën e përfaqësuesve të ERE-s, KESH sh.a., OST sh.a. dhe OSHEE sh.a. Gjatë takimit nga ana e OSHEE sh.a., ndër të tjera, u shpreh se do të respektojë mekanizmin balancues që ka qenë në atë kohë siç po respekton të tanishmin dhe se korrigjimet kanë efekt financiar.

Sa i takon impaktit financiar tek OSHEE sh.a., të kësaj vendimmarrje, konstatohet se ky pretendim është pjesë e konstatimeve edhe në vendimin nr. 110, datë 14.5.2018, ku në faqen 4–5 të këtij vendimi thuhet:

Faturat e lëshuara nga OST sh.a. për disbalancat janë firmosur dhe pranuar nga të dyja palët.

Problematika e disbalancave shtrihet në periudhën 1 korrik 2016–dhjetor 2017 pikërisht në periudhën kur OSHEE sh.a. është bërë palë përgjegjëse për balancim në bazë të ligjit.

Problematika e shkaktuar vjen nga Prodhuësit me Përparësi të Energjisë të lidhur në rrjetin e transmetimit dhe atë të shpërndarjes të cilat nuk janë subjekt i disbalancave, por të gjithë energjinë e prodhuar janë të detyruar ta shesin tek OSHEE sh.a. dhe tashmë janë zhveshur nga llogaritjet për të cilat OSHEE sh.a. nuk ka të dhëna në frekuencat kohore që përkojnë me nominimet dhe komponentët që nevojiten për zbatimin e mekanizmit llogaritës së disbalancave, ndërkohë kjo disbalancë pozitive është e pasqyruar vetëm në fatura dhe nuk është energji e prodhuar apo e lëvruar në rrjet.

Propozimi për ndryshimin e mekanizmit llogaritës së disbalancave është paraqitur nga OST sh.a.

në ERE në tetor 2016, por duke qenë se komponentë që nevojiten për zbatimin e këtij mekanizmi ishin dhe PPE (të cilët ligji nr. 138/2013, “Për burimet e energjisë së rinovueshme”, si dhe më pas ligji nr. 7/2017, “Për nxitjen e përdorimit të energjisë nga burimet e rinovueshme”, neni 22, pika 5, i përjashton nga detyrimi për kostot e disbalancave të shkaktuara deri më 31 dhjetor 2022), si dhe HEC Ashta, i cili trajtohet me marrëveshje të veçantë PPA, e cila trajton përgjegjësinë për balancim në mënyrë specifike, si dhe ligji për energjitë e rinovueshme; rregullat e tregut dhe të balancimit në atë kohë ishin në proces amendimi, si dhe jo të gjitha palët shprehen dakordësinë për këtë propozim të OST sh.a., u vendos që kjo e fundit të vijonte trajtimin e disbalancave sipas akteve ligjore dhe nënligjore në fuqi në atë kohë deri me amendimin e këtyre akteve.

Impakti financiar që do të vijë nga korigjimi i faturave do të reflektohet tek OSHEE-ja.

Korigjimi nuk do të ketë impakt në bilancin energjetik, i cili bazohet në matje, ndërsa disbalancat nuk janë fluks energjie pasi është vetëm programim. Dhe tek OSHEE do të reflektohet vetëm si vlerë dhe afektohet vetëm bilanci financiar.

Korigjimi i faturave do të bëhet muaj për muaj për të dyja kompanitë.

Llogaritja e disbalancave duhej bërë me programimin dhe matjen e KESH sh.a. që në fillim.

Mekanizmi i llogaritjes ka qenë dhe është i rregullt, por ndryshon vetëm mënyra e programit të përdorur.

Sa më sipër, kërkesa nr. 9804, datë 28.5.2018 e OSHEE sh.a., nuk përmban prova të reja siç kërkohet në nenin 16, të ligjit nr. 43/2015, “Për sektorin e energjisë elektrike”.

Lidhur me korrespondencën nr. 9804/1, datë 30.5.2018, protokolluar në ERE në datën 13.6.2018, konstatohet se ky komunikim është paraqitur përtej afatit 7–ditor të përcaktuar në ligjin e sipërcituar.

Lidhur me pretendimet e parashtruara nga OSHEE sh.a. në këtë komunikim mbi prapaveprueshmërinë e vendimit nr. 110, datë 14.5.2018, vërehet se qartësisht edhe në vendimin nr. 110/2018 të ERE-s, në faqen 5 të tij sqarohet se:

Rregullat e Përkohshme të Tregut, përcaktojnë në kapitullin XI.2.3:

Në rast mosmarrëveshje, pjesëmarrësi është i detyruar të paguajë shumën korresponduese në përputhje me udhëzimet për nxjerrjen e faturave të nxjerrë nga OST-ja; mosmarrëveshja nuk vonon ekzekutimin e detyrimeve. Pas zgjidhjes së mosmarrëveshjes do të bëhet korigjimi i faturës, po të jetë e nevojshme.

Për gjithë sa më sipër cituar, bordi i ERE-s duke konstatuar se ankimi i OSHEE sh.a. nr. 9804, datë 28.5.2018, nuk përmban prova të reja dhe korrespondenca vijuese nr. 9804/1 prot., datë 30.5.2018 (depozituar në datën 13.6.2018) në ERE, është bërë jashtë afateve ligjore, e si të tillë nuk plotëson mund të çojë Bordin në marrjen e një vendimi të ndryshëm nga ai i ankimuar.

Për gjithë sa më sipër, bordi i ERE-s

VENDOSI:

1. Të rrëzojë kërkesën e OSHEE sh.a. për rishikimin e vendimit të bordit të ERE-s nr. 110, datë 14.5.2018, “Mbi zgjidhjen e mosmarrëveshjes ndërmjet KESH sh.a. dhe OST sh.a., lidhur me korigjimin e faturave për shërbimin e balancimit sipas parashikimeve të akteve ligjore dhe nënligjore në fuqi dhe përlogaritjeve nga OST sh.a., të rakorduara dhe të pranuar nga palët përgjegjëse për periudhën 1 korrik 2016–31 dhjetor 2017”, mbështetur në pikën 5, të nenit 16, të ligjit nr. 43/2015, “Për sektorin e energjisë elektrike”, të ndryshuar, si dhe nenin 16, të “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.6.2016.

2. Drejtoria Juridike dhe e Mbrojtjes së Konsumatorit, të njoftojë kërkuesin për vendimin e bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga

botimi në Fletoren Zyrtare.

KRYETARI
Petrit Ahmeti